

Wigemark: **Javna uprava** mora biti nepristrasna, a ne služiti za raspodjelu pozicija



Šef Delegacije EU i njen specijalni predstavnik za BiH Lars-Gunnar Wigemark kazao je tokom današnje konferencije o izazovima javne reforme, kojoj je prisustvovao i predsjedavajući Vijeća ministara BiH Denis Zvizdić, da je neophodno težiti nepristrasnoj **javnoj upravi** koja neće služiti samo za diskusiju o raspodjeli pozicija.

"Imajući u vidu da je ovo izborna godina u Bosni i Hercegovini, vjerujem da će tema nepristrasne **javne uprave** približiti sve građane, a samim tim približiti i Bosnu i Hercegovinu Evropskoj uniji. Predstavnicima političkih stranaka trebalo bi da učestvuju u ovoj diskusiji, umjesto da se diskusija svodi na raspodjelu pozicija", rekao je Wigemark.

Predsjedavajući Vijeća ministara BiH Denis Zvizdić istakao je kako međunarodna zajednica Bosni i Hercegovini znatno pomaže u svim segmentima pa tako i kada je riječ o **reformi javne uprave**.

"Jednostavne i efikasne procedure **javne uprave** su neophodne, sve kako bi se život u Bosni i Hercegovini prilagodio stečevini Evropske unije. **Reforma javne uprave** je jedna od mjera koje

mi ispunjavamo. Nama su ostala još tri zadatka. Sve to ćemo napraviti u narednom periodu. Objavit ćemo da je Vijeće ministara realiziralo sve mjere iz Reformske agende", poručio je Zvizdić.

Istakao je da na nije istina da se na ekonomskoj Reformskoj agendi ne radi ništa te da je istina sasvim drugačija.

"Prava istina je da se godinama nije radilo ništa do našeg dolaska u Vijeće ministara BiH. To je pravo pitanje koje treba postaviti onima koji su evropski i NATO put ostavili po strani. Aplikacija je prihvaćena, dobili smo upitnik. Kada je riječ o NATO integracijama, uknjižili smo 32 lokacije. Nijedna lokacija nije bila uknjižena, takvo stanje smo zatekli", podsjetio je Zvizdić.

Dodao je da je **reforma javne uprave** dio reformi i da očekuje da se renovirana **reforma javne uprave** usvoji.

"Ono što pojedinci sve vrijeme žele da izbjegnu jeste da imamo problem sa složenim ustavnim sistemom. Mi imamo 13 različitih zakona zbog kojih investitori ne mogu da se snađu. Mislim da je urađen veliki posao kada je riječ o **reformi javne uprave**. Nismo potpuno zadovoljni, ali smo promijenili matricu ponašanja državnih službenika", kategoričan je Zvizdić.

Današnjem skupu su prisustvovali i predstavnici SIGMA-e koji su ujedno i organizatori konferencije, a oni su istakli da Evropska komisija koristi njihove podatke prilikom ocjenjivanja napretka u Bosni i Hercegovini.

"Najveći izazov predstavlja nedostatak evidencija, zbog kojeg nije bilo moguće ocijeniti BiH u nekoliko područja. Pozivam sve institucije da daju relevantne podatke. Pozivam da što prije završimo rad na novom dokumentu", poručili su iz SIGMA-e.